



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o utvrđivanju i načinu sufinansiranja kulturnih manifestacija
od posebnog interesa za Grad Sarajevo
(Prijedlog)

Predlagač: Gradonačelnica
Obradivač: Gradska služba za obrazovanje,
kulturu, sport i mlade

Sarajevo, februar 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), te Zaključka Gradskog vijeća broj: 01-GV-02-836-1/21 od 19.07.2021. godine, Gradsko vijeće Grada Sarajeva, na __. sjednici održanoj dana __. __. 2024. godine, donijelo je:

(Prijedlog)

**Odluku
o utvrđivanju i načinu sufinansiranja kulturnih manifestacija
od posebnog interesa za Grad Sarajevo**

I – OPĆE ODREDBE

Član 1.

(Predmet Odluke)

Ovom odlukom utvrđuju se kulturne manifestacije od posebnog interesa za Grada Sarajevo i način njihovog sufinansiranja.

Član 2.

(Kulturne manifestacije)

(1) Kulturne manifestacije iz člana 1. ove odluke su:

- a) Internacionalni teatarski festival MESS kojeg organizira JU MES Međunarodni teatarski festival Scena MESS;
- b) Godišnji koncert Sarajevo Big Band kojeg organizira Udruženje muzičara Saraj Pro Brass;
- c) Međunarodna književna manifestacija „Sarajevski dani poezije“ koju organizira Društvo pisaca Bosne i Hercegovine;
- d) Sarajevske večeri muzike SVEM koje organizira Fondacija za muzičke umjetnosti;
- e) Bašćaršijske noći koje organizira JU Bosanski kulturni centar;
- f) Internacionalni muzički festival Jazz fest kojeg organizira Udruženje Jazz Fest;
- g) Balet Fest Sarajevo kojeg organizira Udruženje za razvoj kulture i umjetnosti „Baleti“;
- h) Međunarodni festival književnosti Bookstan kojeg organizira Udruženje „Međunarodni festival književnosti“ Sarajevo
- i) Festival dječje umjetnosti – Fedu kojeg organizira Udruženje za promociju kulture „Fani“;
- j) Internacionalni festival srednjoškolskog teatra – Juventafest kojeg organizira Udruženje za razvoj i unaprjeđenje multimedijalnih umjetnosti i kulture „Medija Art“;
- k) Šestoaprilska izložba koju organizira JU Collegium Artisticum Sarajevo;
- l) Međunarodni festival „Dani Jurislava Korenića“ kojeg organizira JU Kamerni teatar 55.

II – KRITERIJI I NAČIN SUFINANSIRANJA KULTURNIH MANIFESTACIJA OD POSEBNOG INTERESA ZA GRAD SARAJEVO

Član 3.

(Finansiranje)

Manifestacije iz člana 2. ove odluke Grad Sarajevo će sufinansirati iz sredstava Budžeta Grada Sarajeva sa pozicije: Primjena Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo.

Član 4.
(Opći i posebni kriteriji)

(1) Sufinansiranje manifestacija iz člana 2. ove odluke vršit će se u skladu sa općim i posebnim kriterijima i to:

a) Opći kriteriji:

- 1) Izvod iz registra podnosioca zahtjeva za sufinansiranje kulturne manifestacije (original ili ovjerena kopija ne starija od šest mjeseci) gdje je jasno naznačena osoba za zastupanje;
- 2) Uvjerenje o poreskoj registraciji – identifikacioni broj;
- 3) Ugovor sa bankom gdje je jasno naznačen broj transakcijskog računa u poslovnoj banci (original ili ovjerena fotokopija). Javne ustanove dostavljaju uputstvo za način uplate sredstava;
- 4) Prijedlog programa manifestacije (teme, gosti, učesnici) sa specifikacijom troškova i drugim izvorima finansiranja te jasnim prijedlogom koji dio sufinansira Grad Sarajevo u okviru manifestacije;
- 5) Izjava da su obezbijeđeni tehnički, ljudski i materijalni uslovi neophodni za realizaciju planiranih aktivnosti;
- 6) Finansijski izvještaj o utrošku sredstava odobrenih u prethodnoj godini (ukoliko nisu opravdana finansijska sredstva u prethodnom periodu, zahtjev neće biti razmatran).

b) Posebni kriteriji:

- 1) Kvalitet i značaj ponuđenih kulturnih programa za Grad Sarajevo;
- 2) Kontinuitet ponuđenih kulturnih programa;
- 3) Stepen doprinosa afirmaciji bosanskohercegovačke kulture;
- 4) Uticaj ponuđenih kulturnih programa na širu društvenu zajednicu;
- 5) Uticaj ponuđenih kulturnih programa na međunarodnu promociju Grada Sarajeva;
- 6) Uticaj ponuđenih kulturnih programa na razvoj turizma u Gradu Sarajevu i BiH;
- 7) Kulturni programi koji odražavaju multikulturni i multietnički karakter Grada;
- 8) Manifestacije koje u svojim programima daju podršku i afirmaciju mladim talentima i stvaraocima u oblasti kulturi.

Član 5.
(Podnošenje zahtjeva)

(1) Gradonačelnik/ca Grada Sarajeva će, putem Gradske službe za obrazovanje, kulturu, sport i mlade (u daljnjem tekstu: nadležna Služba) na službenoj stranici Grada www.sarajevo.ba jedanput godišnje donijeti obavijest kojom se organizatori kulturnih manifestacija obavezuju da u traženom roku od 15 dana dostave prijedlog programa manifestacije uz potrebnu dokumentaciju.

(2) Na osnovu obavještenja, organizatori manifestacije dužni su podnijeti popunjen obrazac zahtjeva za sufinansiranje manifestacije gradonačelniku/ci Grada Sarajeva, putem nadležne Službe, sa kompletnom dokumentacijom kojom se dokazuje ispunjenost općih i posebnih kriterija.

(3) Obrazac zahtjeva je sastavni dio ove odluke.

(4) Zahtjev se neće razmatrati ukoliko se utvrdi da ponuđena manifestacija narušava ugled Grada Sarajeva ili na bilo kakav način može izazvati sudski spor.

Član 6.
(Reguliranje prava i obaveza)

(1) Prijedlog programa manifestacije uz potrebnu dokumentaciju iz člana 5. ove odluke, nadležna Služba u skladu sa kriterijima utvrđenim ovom odlukom procjenjuje sa stanovišta značaja za Grad Sarajevo te, shodno valjanosti i kvalitetu istih, svoje stavove i mišljenje, sa

obrazloženim prijedlogom i visinom iznosa sredstava neophodnih za realizaciju, dostavlja gradonačelniku/ci Grada Sarajeva koja donosi konačnu odluku.

(2) Gradonačelnik/ca Grada Sarajeva se obavezuje da sa organizatorima manifestacija zaključi pojedinačne Ugovore kojima će se regulirati međusobna prava i obaveze.

Član 7.

(Pravdanje odobrenih sredstava)

Organizatori manifestacije su dužni po završetku manifestacije opravdati odobrena sredstva i dostaviti gradonačelniku/ci izvještaj o namjenskom utrošku sredstava, putem nadležne Službe, najkasnije mjesec dana po završetku manifestacije.

Član 8.

(Gubitak statusa)

(1) Manifestacija može izgubiti status „kulturne manifestacije od posebnog interesa za Grad Sarajevo“ u sljedećim slučajevima:

- a) Ukoliko nisu opravdana odobrena sredstva u naznačenom roku (mjesec dana po završetku manifestacije);
- b) Ukoliko nisu opravdana odobrena finansijska sredstva u skladu sa ugovorenim obavezama i dostavljenom finansijskoj konstrukciji uz zahtjev;
- c) Ukoliko manifestacija prekine kontinuitet održavanja;
- d) Ukoliko realizirani program nije u skladu sa ponuđenim programom u zahtjevu.

III – PRELAZNE I ZAVRŠNE ODREDBE

Član 9.

(Nadzor)

(1) Nadzor nad provedbom ove odluke vrši gradonačelnik/ca Grada Sarajeva putem nadležne Službe. Gradonačelnik/ca Grada Sarajeva se obavezuje da putem nadležne Službe jedanput godišnje dostavi Gradskom vijeću Grada Sarajeva Izvještaj o provođenju ove odluke.

(2) Gradsko vijeće Grada Sarajeva, prilikom utvrđivanja Budžeta Grada Sarajeva za narednu godinu, vrši periodično revidiranje opravdanosti sufinansiranja kulturnih manifestacija iz člana 2. ove odluke.

Član 10.

(Postupak donošenja Odluke)

Izmjene i dopune Odluke vrše se na način i po postupku za njeno donošenje.

Član 11.

(Prestanak važenja Odluke)

Stupanjem na snagu ove odluke prestaje da važi Odluka o utvrđivanju i sufinansiranju kulturnih manifestacija od posebnog interesa za Grad Sarajevo („Službene novine Kantona Sarajevo“ broj 10/19).

Član 12.

(Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:

Sarajevo, __. __.2024. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statut Grada Sarajeva („Službene novine Kantona Sarajevo“, broj 7/23) kojim je propisano da Gradsko vijeće donosi odluke, druge propise i opće akte i daje njihovo tumačenje.

RAZLOZI DONOŠENJA

Na sjednici Gradskog vijeća Grada Sarajeva, održanoj dana 19.07.2021. godine, razmatrana je Odluka o sufinansiranju kulturnih manifestacija od posebnog interesa za Grad Sarajevo te donesen Zaključak Gradskog vijeća, broj: 01/GV-02-836-1/21 od 19.07.2021. godine, prema kojem je potrebno pristupiti izradi nove Odluke o kulturnim manifestacijama od značaja za Grad Sarajevo, kao i na osnovu vijećničkog pitanja gradske vijećnice Biljane Lazarević sa 26. sjednice Gradskog vijeća Grada Sarajeva, održane dana 29.03.2023. godine.

Prema pristiglim zahtjevima, ukazala se potreba za uvrštavanje i pružanje finansijske podrške novim manifestacijama koje imaju kontinuitet i koje doprinose afirmaciji Grada Sarajeva i ukupnom razvoju kulture Sarajeva, a time i Bosne i Hercegovine.

FINANSIJSKA SREDSTVA

Finansijska sredstva za realizaciju ove odluke obezbijedena su u Budžetu Grada Sarajeva.



**OBRAZAC ZAHTJEVA
KULTURNE MANIFESTACIJE OD POSEBNOG INTERESA ZA GRAD
SARAJEVO**

PODNOŠILAC ZAHTJEVA	
NAZIV MANIFESTACIJE	
ADRESA /SJEDIŠTE PODNOŠIOCA ZAHTJEVA/	
KONTAKT /TELEFON, E: MAIL/	
IME I PREZIME OVLAŠTENE OSOBE ZA PROVOĐENJE PROJEKTA /NAVESTI I FUNKCIJU/	
DA LI STE RANIJE BILI KORISNIK FINANSIJSKIH SREDSTAVA IZ BUDŽETA GRADA SARAJEVA (NAPISATI IZNOS I NAZIV PROJEKTA)	
FINANSIJSKA VRIJEDNOST DOSTAVLJENOG PROJEKTA	
IZNOS OČEKIVANIH FINANSIJSKIH SREDSTAVA IZ BUDŽETA GRADA SARAJEVO	

**Uz popunjen prijavni obrazac dostavljam i sljedeću dokumentaciju putem protokola
Grada Sarajeva / Ulica Ćemaluša broj 9, 71 000 Sarajevo/:**

1. Prijedlog projekta sa programom i realni prijedlog šta Grad Sarajevo sufinansira;
2. Ovjerenu fotokopiju rješenja o registraciji ili izvadak iz registra gdje je vidljivo tko su ovlaštene osobe udruženja;

3. Ovjerenu fotokopiju ID broja;
4. Ovjerenu fotokopiju ugovora sa bankom (javne ustanove dostavljaju uputstvo o načinu uplate);
5. Finansijska konstrukcija (prihodi i rashodi projekta) radi kasnijeg pravdanja namjenskog utroška sredstava;
6. Izjavu na vašem memorandumu da imate obezbjeđene ljudske, materijalne i tehničke resurse za realizaciju planiranih aktivnosti.

Napomena: Sva priložena dokumentacija mora biti original ili ovjerena u nadležnoj općinskoj službi i ne starija od 6 mjeseci. Dostavljena dokumentacija se ne vraća podnosiocu zahtjeva. Nepotpuna dokumentacija i bez popunjenog obrasca, neće se razmatrati.

POTPIS PODNOSIOCA ZAHTJEVA